

# Sungai Ngulang masih boleh diselamatkan

Kualiti air kategori Kelas Satu, perlu rawatan minimum

**Kangar:** Sungai Ngulang yang dilaporkan tercemar masih boleh diselamatkan kerana tahap pencemaran didapati tidak seteruk seperti pencemaran yang berlaku di sungai lain.

Presiden Persatuan Pencinta Alam Malaysia (MNS), Prof Dr Ahmad Ismail, berkata Perlis bernasib baik kerana kualiti air di kebanyakan sungai di negeri itu dikategorikan sebagai Kelas Satu oleh Jabatan Alam Sekitar (JAS) iaitu Indeks Kualiti Air (WQI) berada pada tahap bacaan 92.7 hingga 100, selain mempunyai ekosistem yang sihat.

Beliau berkata, Kelas Satu bermaksud air sungai selamat diminum dan hanya memerlukan rawatan air yang sangat minimum serta sesuai untuk menjadi habitat hidupan akuatik.

"Bagaimanapun, kerajaan

Perlis perlu mengambil tindakan segera bagi menangani isu pencemaran sungai di negeri itu bagi memastikan kualiti air sungai kekal pada paras Kelas Satu.

"Bagi Sungai Ngulang, pencemaran yang dilaporkan itu masih boleh dipulihkan kerana tahap pencemarannya tidak seteruk yang berlaku di sungai lain," katanya semalam.

JAS Perlis sebelum ini mengambil sampel air di Sungai Ngulang selepas menerima aduan orang ramai mengenai warna air sungai yang dilihat bertukar hitam beberapa hari lalu.

Sampel air berkenaan dihantar ke Jabatan Kimia di Alor Setar, Kedah, untuk mengenal pasti punca pencemaran dan tidak menolak ia disebabkan aktiviti industri serta kegiatan penanaman sawah padi yang berdekatan sungai itu.

Ahmad berkata, kerajaan Perlis juga disaran terus memperkasa perancangan, pemantauan dan penguatkuasaan undang-undang bagi memastikan sungai di negeri itu kekal bersih.

Justeru, katanya, kerajaan negeri dan pihak terbabit perlu memastikan semua pembangunan dan aktiviti manusia dipantau

mengikut undang-undang sedia ada.

"Selain itu, perlu diwujudkan zon penampungan iaitu jarak antara sawah dan sungai kerana ia boleh menyumbangkan pencemaran sisa pertanian yang mengalir terus ke dalam sungai," katanya.

Ahmad berkata, kerajaan negeri juga perlu mengawal dan memantau kegiatan pembuangan sampah ke sungai, pene-rokaan hutan di hulu sungai dan memberi pendidikan secara berterusan kepada masyarakat supaya menyalah sungai serta bersama-sama menjaga kebersihan sungai.

BERNAMA

*Kedudukan Sungai Ngulang, Perlis yang dilaporkan tercemar hanya perlu rawatan yang sangat minimum.*



LOT BUMIPUTERA  
UNTUK JUALAN

